

ILUARSISSUT

Isumaliutissiissut ulloq 29. april 2016-imeersoq taarserpaa

(Tunuliaqut: Isumaliutissiissutip qulequtaa kukkusuummat iluarsineqarpoq)

**Uunga siunnersuut: Inuussutissarsiutinik ilinniartitsinerit aamma inuussutissarsiutinik
ilinniartitsinerup iluani pikkorissaanerit pillugit Inatsisartut inatsisaata
allanngortinneqarneranik Inatsisartut inatsisaat nr. xx, xx xx 2016-imeersoq.**

(Ilinniarnernik piginnaasalissutaasunillu ingerlatsinernik allanik neqerooruteqarsinnaanermut tunngavissiineq, lærlinginut isumaqatigiissuteqarsinnaanermut immikkut periarfissiineq, atuarfinni sulilluni sungiusarnernut, ileqqoreqqusanut il.il. tunngasunik aalajangersakkanik erseqqissaaneq kiisalu Oqaatsinik Pikkorissarfik pillugu Inatsisartut inatsisaannik atorunnaarsitsineq)

pillugu

**Kultureqarnermut, Ilinniartitaanermut, Iisimatusarnermut
Ilageeqarnermullu Ataatsimiititaliap**

siunnersuutip aappassaaneerreqarneranut

ISUMALIUTISSIISSUTAA

Kultureqarnermut, Ilinniartitaanermut, Iisimatusarnermut Ilageeqarnermullu
Ataatsimiititaliaq suliarinninnermini ukuningga inuttaqarpoq:

Inatsisartunut ilaasortaq Vivian Motzfeldt, Siumut, siulittaasoq
Inatsisartunut ilaasortaq Peter Olsen, Inuit Ataqtigiit, siulittaasup tullia
Inatsisartunut ilaasortaq Suka K. Frederiksen, Siumut
Inatsisartunut ilaasortaq Poul Hansen, Demokratit
Inatsisartunut ilaasortaq Mimi Karlsen, Inuit Ataqtigiit

Siunnersuut UPA2016-ip ingerlanneqarnerani ulloq 12. april siullermeerlugu
suliarineqarnerata kingorna ataatsimiititaliamit misissorneqarpoq.

1. Siunnersuutip imarisai siunertaalu

Siunnersuut arlariinnik sammiveqarpoq. Taamaaliornikkut siunnersuummi ilaatigut qulakkeerniarneqarpoq akuerisaasumik inuussutissalerinnermut sammiveqartunik ilinniartitsinermi piareersaataasumik faginut neqeroorutaasut taakkunungalu misilitsinnernut inatsisitigut tunngavissaqalernissaq (AEU).

Ilanngullugulu siunnersuummi paaserusunneqarpoq inuussutissarsiutinik qitiusumillu ilinniarfiit ingerlaqqiffiusumik ilinniarnermut neqeroorutaasa ilaasa tunngavissaat suunersut qulaajassallugit. Uani taamaallaat pineqarput ingerlaqqiffiusumik ilinniakkat Kalaallit nunaanni neqeroorutaariinngitsut.

Tamatuma saniatigut siunnersuutigineqarpoq ilinniarfimmi sungiusarluni sulinerup suliffeqarfimmi sungiusarluni sulinnermut taarsiullugu sungiusarluni sulisinnaanissaq, tamanna ima paasillugu ilinniliartoq suliffeqarfimmi sulinnermut sungiusarfissaqanngikkuni taarsiullugu suliffimmut sungiusarneq inuussutissarsiutinik ilinniagaqarfimmi ingerlassinnaallugu. Tamatumunnga atatillugu ilinniarfinni ilinniarnermi aamma ilinniarfinni sungiusarluni sulinnermi ilinniagaqarnersiutinut malittarisassanik suliaqartoqassaaq. Tamatumunnga tunngatillugu atuarfimmiiinnermi atuarfimmilu suliffimmik sungiusarnermi ilinniarnermut isumaqatigiissut atunngikkaluarlugu ilinniagaqarnersiutit pillugit maleruagassanik suliaqartoqassalluni

Ilanngullugu siunnersuutigineqarpoq inuussutissarsiutinik ilinniagaqarnerup nalaani pikkorissarnermi angalanermut najugaqarnermilu killilimmik tapiissutinik pissarsisarnermut tunngasunik aalajangersakkat ullumikkut killiliisartut atorunnaarsinneqarnissaat. Killilersuineq tamanna ilinniagaqarsimaneq patsisigalugu ullumikkut tunngavilersorneqartarpoq.

Imarisat inuussutissarsiornermi ilinniartitaanermut tunngasut qulaani taaneqartut saniatigut siunnersuummi matumani ilanngullugu siunnersuutigineqarpoq Oqaatsinik Pikkorissarfik pillugu Inatsisartut Inatsisaata atuuttup atorunnaarsinneqarnissaa. Tamanna ima isumaqarpoq; Oqaatsinik Pikkorissarfimmi sulianut sinaakkutaasut Naalakkersuisunit toqqaannartumik aalajangersorneqartalernissaannik. Tamanna siunissami oqaatsinik pikkorissarfimmi ingerlanneqartunut tamanut atuutilissaaq. Siunnersuut una taamatut isikkoqartillugu akuerineqassappat Oqaatsinik Pikkorissarfiup siunissami suliassanut tamanut atuuttussaavoq.

2. Siunnersuutip Inatsisartuni siullermeerneqarnera

Siunnersuut siullermeerlugu eqqartorneqarpoq 13. april 2016. Tassani siunnersuut tamakkiisumik partiinit tamanit attaviitsumillu tapersersorneqarpoq, taamaattorli inersuarmi oqallinnermi erserpoq ilinniarnermi suliffimmik sungiusarfissamik ujaasinnermut tunngatillugu akisussaaffimmik agguataarineq, siunnersuummilu aningaasaqarnikkut pissutsit il.il. oqallisigineqarnissaat kissaatigineqartoq.

3. Tusarniummut akissutit

Tusarniaanermi akissuteqaatit tiguneqartut inatsisissatut siunnersuummut ilanngunneqarsimapput, tamannalu Inatsisartuni Siulittaasoqarfiup piomasqaataanut naapertuuppoq.

Siunnersuut 4. december 2015 aamma 8. januar 2016 akornani tusarniutigineqarsimasoq ataatsimiititaliamit maluginiarneqarpoq. Naalakkersuisut sulinngiffeqarnerup nalaani tusarniaanermi piffissamik sivitsueqqaaratik tusarniaasannginnissaat ataatsimiititaliamit kaammattuutigineqassaaq.

Tusarniaaffigineqartut tusarniutigineqartumut kinguneqarsinnaasumik piviusorsiortumik isummersinnaanermut periarfissinneqartariaqarput. Tamatumani pingaartumik Naalakkersuisoqarfiit ilisimappassuk tusarniaaffigineqartut sulinngiffeqarfiusup pineqartup nalaani inatsisissatut siunnersuutit pillugit tusarniutinik arlalinnik tiguisinnaasarnerat.

Ataatsimiititaliap paasinninnera malillugu siunnersuut una ima pinartiginnigilaq tusarniaaneq piffissamik sivitsueqqaarnani sulinngiffeqarnerup nalaani ingerlattariaqartutut. Inatsisissatut siunnersuutit il.il tusarniutigineqartut imarisaasa misissorneqarnissaanut suliffeqarfiit tusarniaaffigineqartut piffissaqartinneqartarnissaannik Naalakkersuisut qulakkeerinninniaartaqullugit ataatsimiititaliamit innersuussutigineqarpoq. Ilaatigut tusarniaanermi piffissartinneqartoq naammattoq Inatsisartuni aalajangiinissamut tunngavissat pitsaanersarigaat ataatsimiititaliamit isumaqarfigineqarpoq.

4. Siunnersuutip ataatsimiititaliami suliarineqarnera

4.1 Inuussutissarsiutinik ilinniarnert pillugit

Inuussutissarsiornermut iliniarfiit ilinniartunik amerlanerusunik tiguisalerneranut amerlanerusut ilinniakkaminnik naammassinnittarneranik kinguneqartumut tapersersuinini Aallaqqaasiullugu ataatsimiititaliap oqaatigerusuppa. Taamaalilluni ersarippoq nunatsinni ilinniagaqartut unammilligassaasa annersarigaat ilinniarnermut atatillugu suliffimmik sungiusarfissamik nassaarnissaaq. Inuussutissarsiutinik ilinniagaqarfinni suliaqartut aamma politikikkut suliaqartut inatsisitigut suliniuteqarnerup ilinniagaqarfinnut isersinnaaneq iliniakkamillu naammassinnissinnaaneq pillugit nunap ajornartorsiutai annertuut inatsisitigut allannguinerinnakkut iluarsineqarsinnaaneranik isumaqalinnginnissaasa pingaaruteqarnera ataatsimiititaliamit erseqqissaatigineqassaaq. Suliniutit inatsisitigut sinaakkutissanik taamaallaat tunngaveqartariaqanngillat, aammali suliffiit ataasiakkaat avatangiisaanut, ilinniartut ataasiakkaat isumaannut taamatuttaarlu inuiaqatigiit ataatsimut ilinniagaqartarnermut isummertarnernut tunngasinnaallutik. Akisussaaffik politikikkut suliaqarnermiippoq, suliffeqarfinni kiisalu inuttaasuni namminermei.

Ilinniartut inuussutissarsiutinik ilinniakkaminnik naammassinnittarnissaannut kajumissaarutitut iliniarfinni sulinermut sungiusartarnissaaq pillugu siunnersuut una ataatsimiititaliamit isigineqarpoq. Ilinniarnermut atatillugu suliffimmik sungiusarfissanik

inuussutissarsiutinullu ilinniartinnik amerlanernik pilersitsisoqarnissaanik suliniuteqarnerup tamakkiinerusumik ingerlanneqarnissaanut Naalakkersuisut kaammattuinerusariaqartut ataatsimiititaliamit isumaqarfigineqarpoq. Tamanna assersuutigalugu ingerlanneqarsinnaavoq pisortat suliariumannittussarsiuussinerisa eqqumaffigineqarnerisigut kiisalu nunatsinni suliffeqarfinni namminersortuni, Namminersorlutik Oqartussaapigineqatigiiffiini il.il ilinniarnermut atatillugu suliffimmik sungiusartunik tigusarnerup iluaqutaassusaanik erseqqissaasarnermi. Kingullertullu ataatsimiititaliamit maluginiarneqarpoq suliffimmi sungiusarfissanik amigaateqarnerup oqallisigineqarnerani inuiaqatigiinni ilinniarnermut atatillugu suliffimmik sungiusartunik tiguseqqinnissamut annertuumik periarfissaqartitsisoqartoq.

Ilinniarnernup ingerlanerani suliffimmik sungiusartarnerup ilinniarnermut iluaqutaanera aammalu sulisussanik akikitsumik sulisinnaasutut iluaqutiginiarneqartussatut isigineqannginnissaat ataatsimiititaliamit pingaartinneqarmat erseqqissaatigineqassaaq. Tamanna atuuppoq ilinniartoq suliffeqarfinni ilinniagaqarfinmiluunniit suliffimmut sungiusarpat.

Imm. 6 tunngavigalugu illoqarfinni ilinniagaqarfinni pinnani illoqarfinni allami pikkorissarnermut peqataassagaanni angalanermut ineqarnermullu aningaasartuutaasussanik oqilisaassinerusaaq. Siunnersuutip ilinniakkamut allamut nuussinnaaneq periarfissimmagu ataatsimiititaliamit iluarisimaarneqarpoq.

4.2 Oqaatsinik Pikkorissarfik pillugu

Oqaatsinik Pikkorissarfik pillugu Inatsisartut inatsisaat nr. 14, 6. november 1997- imeersup atorunnaarsinneqarnerani kinguneqaataasussanut ataatsimiititaliaq annertunerusumik oqaaseqaatissaqanngilaq. Taamaattorli ilinniartitaaneq pillugu inatsimmut allannguutissatut siunnersuummut atatillugu inatsisip allap Naalakkersuisunit atorunnaarsinneqarnissaa ataatsimiititaliamit tupigineqarpoq. Inuussutissarsiutinut ilinniarnermut inatsit oqaatsinik pikkorissarfimmut attuumassuteqanngilaq.

Kalaallit Nunaanni inuiaqatigiinni kalaallit oqaasiisa siammarsarneqarnerani suliaq kiisalu Kalaallit Nunaanni oqaatsinik piginnaasanik ineriartortitsineq ataatsimiititaliamit malinnaaffiginiarneqarpoq

5. Inatsimmik iluarsineq

Inatsisissatut siunnersuutip nassuiaatitaasa ilusilersorneqarneranni kukkuneqartoq kiisalu § 1 oqaaseqatigiit pingajuannut nassuiaat amigaataasoq immikkoortup ataatsimiititaliamit suliarineqarnerani malugineqarpoq. Ataatsimiititaliaq paasivaa tamanna Naalakkersuisunut eqqumaffigineqartoq aammalu tamatuma aaqqinneqarnissaa siunnersuutip matuma aappassanneernejarnanumut aaqqiissuteqalersaartut.

6. Siunnersuutip aningaasatigut kingunissai

Siunnersuummut nassuiaatini nalinginnaasuni allassimavoq inuussutissarsiutinut iliniagallit maanaannaq unitsitsisarnerisa apparnissaa naatsorsuutigineqartoq. Ataatsimut isigalugu inuussutissarsiutinut ilinniartitaanerup pitsanngoriarnissaa siunnersuuteqartup naatsorsuutigaa. Siunnersuut pisortanut aningaasartuutaasussanngitsutut isigineqartoq ilanngullugu oqaatigineqarpoq. Taamatut isumaqarnejq ataatsimiititaliamit tamakkiisumik isumaqatigineqanngilaq Naalakkersuisunullu kaammattuutigissallugu inatsisissatut siunnersuutip aningaasaqarnikkut allaffissornikkullu kingunerisinnaasai sukumiinerusumik naliliiffigesaqullugit. Siunnersuutip aningaasaqarnikkut kingunerisassaasa pissusissaatut peqqissaartumik nassuiaatiginerat siunnersuummut namminermt patajaallisaataaginnarani aammali Inatsisartut aalajangiinissamut tunngavissaqarnissaannut patajaallisaataasarpoq.

Imm. 6-mi takuneqarsinnaavoq ullumikkut ilinniartut illoqarfigisartik qimallugu inuussutissarsiutinut pikkorissarnermt peqataasinnaanerantut atatillugu killiliisartut angalanermt ineqarnermullu aningaasartuutit peerniarneqartut. Inuit ilinniagartuut suliffimmut allamut nuunissamut kissaateqartut tamanna ajornartorsiutigisaraat assersuutigineqarsimavoq. Maannakkut inatsisit tunngavigalugit taamatut iliniagallit ilinniarsimasatik pissutigalugit pikkorissarnermt tapiiffigineqarnissamut periarfissaqanngillat. Naatsorsuutigineqassaaq oqilisaassineq tamanna aningaasartuutinik kinguneqartussaammat. Aningaasartuutissalli taakku ataatsimiititaliamit eqqortumik naatsorsorneqarsinnaanngillat. Siunnersuut oqilisaassinermt tamatumunnga atatillugu naatsorsuutigineqanngitsumik aningaasartuutaassagaluarpat, immikkoortumi pineqartumi aningaasaliissutaareersunik aningaasartuutaasussaaavoq, tamatumalu kingunerisaanik suliniutit allat pingaarnersiunermt kingulliinneqartussanngussallutik. Siunnersuutip aappassaanneernejqarnissaanut Naalakkersuisunit tamatuma eqqumaffigineqarnissaa ataatsimiititaliamit kaammattuutigineqarpoq.

Oqaatsinik Pikkorissarfimmut tunngatillugu ataatsimiititaliamit maluginiarneqarpoq siulersuisunik aammalu taassuma allattoqarfianik atorunnaarsitsinerup aningaasaqarnikkut kingunerisassai aammalu Oqaatsinik Pikkorissarfik pillugu Inatsisartut inatsisaata atorunnaarsinneqarnerata allaffissornikkut aningaasaqarnikkullu kingunerisinnaasai allat Naalakkersuisunit isumaliutigineqarsimasorinangitsut. 2016-imi aningaasanut inatsimmi konto pingaarnermi 40.92.18-imi Oqaatsinik Pikkorissarfiup ukiumut 7.188.000-inik ingerlatsinermt tapiissuteqarfigineqartarneranik allassimasoqarnera eqqarsaatigalugu aningaasaqarnikkut kingunerisassat siunnersuutip matuma aappassaanneernejqarnissaanut, oqaaseqarfigeqqullugit Naalakkersuisut ataatsimiititaliamit qinnuigineqarput.

7. Ataatsimiititaliamit inassutigineqarpoq

Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititalia **isumaqatigiittup** tamanna tunngavigalugu siunnersuut akuerineqartussanngorlugu inassuteqaatigaa.

Taamatut oqaaseqarluni isumaliutissiissummilu allanneqarsimasutut paasinnilluni ataatsimiititaliap siunnersuut appassaanniigassanngortippaa.

Vivian Motzfeldt,
Siulittaasoq

Peter Olsen,
Siulittaasup tullia

Suka K. Frederiksen

Poul Hansen

Mimi Karlsen